

Mafutaga Fa'afouina 2016
Faife'au & A'oa'o Tausinu'u EFKS
"Brexit ma le Mataupu o le lē-fia i ai."

FAATOMUAGA:

E tusia lenei pepa mai le li'o o le Mataupu Silisili faalotoifale (contextual theology). Atonu e faatupu manatu ia tatou i Samoa se mataupu faalotoifale o tupu i Europa i le taimi nei, ae pe lē fesootai foi ma lo tatou lalolagi aua o latou ma tatou o le lotoifale lava o le lalolagi e tasi na foafoa e le Atua soifua.

O le Aso Tofi 23 Iuni 2016, na faia ai se palota (referendum) a tagata Peretania pe latou te lagolagoina le tumau pea i le EU (European Union) pe leai. O le taunuuga, manumalo le "tula'i ese" = 52%, "nonofo pea" = 48%.

FOLAMUA:

O Peretania e aofia ai Egelani(England), Sikotilani(Scotland), Uelese(Wales), Aalani Matu (Nth Ireland). O itutino i latou o le atunuu e tasi United Kingdom (UK) Peretania tele. O Egelani ma Uelese na maualuluga a latou palota e tulai ese. O Sikotilani ma Aalani na fia nonofo pea i le EU. Peitai ua manumalo lava le tuufaatasiga mo Peretania ina ia tulai ese. Ua mae'a le palota, a ua tãlia nei le aso e aloa'ia ai le tuuina ese ma o ese ai loa.

O le EU, o le faamalu o atunuu o Europa na faavae ina ua manatunatu e taua le ola fai fai mea faatasi. E 28 atunuu¹. Na faavaeina lenei iuni ina ua tuana'i le taua lona 2 o le lalolagi (WWII) e uunaia ai le galulue soosoo tau'au o atunuu o Europa; ua latou lagona uma lava e leai se uiga o le va-fetaua'i. E moomia e le tasi le isi. E moni ai John Donne 1573-1631 "No man is an *Iland* intire of itselfe [sic]..."² e leaga le fia tutoatasi. Na faavae le EU 1957 i le igoa EEC (European Economic Community) i le na o le 6 atunuu,³ a ua tupu ma ola. O Peretania faatoa ulufale i ai ile 1973. Lona uiga e na o le 43 tausaga na i ai i totonu Peretania ao lea ua toe fia ulufafo i le 2016.

O le Brexit.

Ua faaigoaina le ulufafo o Peretania. O le *Brexit*; B = Britain + exit. "Peretania ulufafo." Aisea ua fia ulufafo ai Peretania? E 3 nai mafuaaga.

Fai mai le mau,

1. ua tele na'uã le taofiofi o Peretania e le EU i ana mau tulafono i faiga faaPisinisi ua le maua ai le saolotoga e ola ai pisinisi a Peretania.

2. ua tele na'uã tupe alu ai - fees. Faapea upu a lē na taitaia le campaign e o ese;

"Afai e faitau piona tupe e lafo e tatou i le EU, ua tata nei loa ona tuu na tupe mo le faaleleia o le Soifua Maloloina o Peretania (NHS)." O le tauanau lea a Gisela Stuart le tamaitai Faipule Peretania na taitaia le campaign 'Vote-Leave'. E tusa ma faamaumaga EU Facts, e £35m⁴ i le aso e tasi le ma'au o Peretania na fafagaina ai le EU (Brussel) 2013-2014.

¹ 1.Austria, 2.Belgium, 3.Bulgaria, 4.Croatia, 5.Republic of Cyprus, 6.Czech Republic, 7.Denmark, 8.Estonia, 9.Finland, 10.France, 11.Germany, 12.Greece, 13.Hungary, 14.Ireland, 15.Italy, 16.Latvia, 17.Lithuania, 18.Luxembourg, 19.Malta, 20.Netherlands, 21.Poland, 22.Portugal, 23.Romania, 24.Slovakia, 25.Slovenia, 26.Spain, 27.Sweden ma le lona 28, o le UK.

² O le tagata o se vaega o le konetineti (continent) ae le o se konetineti. A soloa e le sami sona ogaeleele, e faaititia ai le konetineti o Europa.

³ Belgium, France, Italy, Luxembourg, Netherlands & West Germany

⁴ O le £55m ile aso na tala'i sese e le Vote-Leave Campaign. Ao Peretania e lona 4 lana foai. 1.Siamani 2.Farani 3.Italia 4.UK E mamao ese lava i luma le sao o Siamani ile EU. (EU Facts)

3. ia toe faafoi mai ia Peretania ona lava faitotoa (borders) ina ia faafoe ma fuafua e Peretania lava ia, aua o tagata ese ua soona lolofi atu e nonofo ma faigaluega i ona laufanua. O le taimi nei i lalo o le EU, e saoloto le fegasoloa'i ma le saili galuega o isi tagata Europa i totonu o Peretania. Lea foi e manuia ai alo o Samoa i le taaloga Lakapi, ona o visa faigaluega/ taalo i soo se atunuu o Europa, o loo faigofie ona o tulafono ma aiaiga a le EU.

O le mea mautinoa, o le fia ulufafo o Peretania, ua mafua lava ona o upufai faapolokiki ma le malosiaga faatamoaiga (politics and economics). Afai e 3 ni tafa taua o se sosaiete, 1.polokiki 2.tamoaiga 3.faaaleagaga, (politics, economics, spirituality) e le taumate le mua o le tamoaiga i le tuuga i Peretania. Ona faanoanoa ai lea o le faipepa ona o le alāva'a lava lea ua alu ai mea a le lalolagi – ua faatuatua'ia lava le leo faaleagaga ma le mataupu silisili i suiga tetele ua tutupu.

Si leo o le Mataupu Silisili.

1. ITU LELEI.

Fai mai Dietrich Bonhoeffer ile 1934 i lana tusiga⁵ e faa'amuia ia Amerika ma lona saolotoga, "Ua faaigoa e Amerika ia lava, o se atunuu/ *eleele o le saolotga*." (land of the free) O le faavae foi lea e tatau ai ona i ai le aia tatau a soo se tagata Amerika ona o le eleele o le saolotoga.

E manatu le pepa, a fua i seisi itu lea manatu faaAmerika ile '*eleele o le saolotoga*', peiseai e fesootai ma le manatu o le Feagaiga Tuai i le eleele o le meatotino a le Atua a ua faameaalofa mai e soifua manuia ai le tagata.... Lona uiga o le Atua e ana le mea totino, ao le tagata na te faa'aaoga. Mafuaaga lea e ta'u mativaina ai tagata uma (penes), tusa pe faigaluega ma maumea, aua o le eleele o loo ia galue ai ma faamanuiaga ua ia maua, e le ni ana meatotino. Peiseai e sosolo faapea le manatu faaAmerika, o le '*eleele o le saolotoga*' e tatau ai la ona saoloto tagata uma, aua e le se eleele/fanua a se tagata se toatasi. O le fanua faitele, ao le meatotino a le Atua – ia saoloto ai tagata uma o Amelika.

Na ta'ua e Bonhoeffer le '*saolotoga*' ua faamati'e e Amelika, aua na ia taumafai e faamati'e faapena le saolotoga na finauina e nai ona uso Kerisiano Siamani toaititi na tete'e atu i le Ekalesia Siamani na sese lo latou ala – ua faalogo ia Hitler. Tagata finau nei (sa i ai foi ma le 2sene a Karl Barth) na latou tusia le Barmen Declaration o se tete'e atu i le Ekalesia Siamani i taimi o le Nazism na latou tuuina i lalo le faaKerisiano i lalo ifo o le pulega a Hitila, ma foliga mai ai e faatonu e Hitila le gasologa o le Ekalesia i Siamani i na aso. Manatu Bonhoeffer, o le saolotoga na finauina e nai ona uso tete'e nei, ma tete'e atu ai i le mea ua agai i ai le toatele, o se mea taua tele lea. E taua le finau ina ia saoloto e ala i le tautala i le sa'o.

Na faafetaia e Keith Clements le faaeaea a Bonhoeffer ia Amerika ma lona faamati'e o le ola saoloto. Peitai, e manatu Clements o Amerika ma lana u'u mau i le '*saolotoga*' na fofoa atu lava ia Peretania. O tagata Peretania o tagata o le saolotoga. Afai foi e tomanatu i aso ua mavae ma le agai atu o tagata papa'e e nofoia Amerika ma isi vaega o le lalolagi, o i latou lava mai Europa aemaise lava i Peretania. O le fatu solo Peretania o William Wordsworth (1770–1850) na ia tusia upu nei "We must be free or die.." O upu nei pei sa fai ma motto o tagata Peretania. Sa faalototele ma faatupu malosia lea motto i fitafita Peretania i le taua 1914-1918 na mafua ai ona a'e mālō, aua ua faatuputeleina lo latou loto nuu. Ia

⁵ "Protestantism without Reformation".

saoloto! ae le fia oti. E tele nisi faataitaiga ia Peretania i le vala lea ua taoto i le talafaasolopito.

E taua le finau ia saoloto... aua a lē saoloto, e oti. O le agaga foi lea na tupu a'e ina ua finauina e Gustavo Gutierrez le faasaolotoina o tagata matitiva i Latin America 1971. Fai mai lana mau, e le mafai ona saoloto pe a lē finau. Na ia finauina foi le sa'oloto o le Lotu mai faiga piopio a le Sosaiete aua o aso ia, na faakegikegi le Ekalesia Katoliko ma pulega piopio a Malo o lea itulagi. O le finau mo se manuia, e tau i le oti. E le galo i le mataupu silisili le tagata finau o Archbishop Oscar Romero, le faifeau El Salvador sa finauina le tete'e atu i faiga piopio a le Malo o lona atunuu. Fai mai le tala, ao ia taitaina le sakalameta o le Kominio (Faamanatuga) i lana aulotu i le aso 24 Māti 1980, na ulufale i le falesa fitafita o le Malo ma faamuta i le pulufana lona soifua. Finauga ia a i latou lototetele na afua ai le Mataupu Silisili o le saolotoga. (Liberation Theology)

O le finau foi lea a Tama Uli i le vaitau o le 1960 ina ia saoloto mai le faailoga-lanu o tagata papa'e. Ua faatoilaloina le Apartheid system i Aferika i Saute i le finau a Nelson Mandela⁶, Desmond Tutu⁷ ma isi, peitai o loo fai ma manu a'e pea le faailoga lanu i nei aso i Amerika. Ao finauga ia i Amerika ua asoa, sa leotetele ai tagata finau ua maliliu pei o Martin Luther King Jr. ma Malcolm X. O loo leotetele ai foi e o loo finau pea pei o James Cone, Cornel West ma isi o le Mataupu Silisili o le saolotoga mo Tagata Uli (Black Theology).

E taua le finau ina ia saoloto. E faapea foi le agaga na tupu a'e ai le lagona e fatu sa tatou Mataupu silisili faaPasefika – faaSamoa. Lagona lea na amata totogo a'e i le fono lona 4 ale PCC⁸ i Toga 1981⁹ ma faamautuina i Suva 1985 ma tatala (launch) aloaia ai loa le Mataupu Silisili o le popo, le *Coconut Theology* a Sione A. Havea e faamata'osi ai se vaai faaPasefika i le Mataupu silisili. Tatou te fia saoloto, tatou te le fia oti.

O le fesili, ae faapefea pe a avea le saoloto ma ala o le oti? Pe le sa'o ai le igoa o le vaega a le o.p.o (ola pe oti)? E fia saoloto ia ola i le Brexit, ae oti ai?

2. ITU faa-lē-LELEI.

O le o ese o Peretania mai le EU e mafai ona faauiga faapea,

(i) Ua faaleaogaina le soofaatasi/ oikoumene/ koinonia.

Ua toe foi Peretania mai le pelulale i le segila (from the plural to the singular), mai le toatele i le toatasi. Peiseai ua toe foi i tua i le lalolagi tuai o le tutoatasi na faava'atu'ia ai le sa o Peretania i aso ua mavae. A ua toso lava i ai e le polokiki ma le tamaoaiga (politics and economics).

A tomanatu i le tupu mai o le FEL (Fono Ekalesia Lalolagi) poo le WCC (World Council of Churches) e le'i itiiti ni aso ma tapenaga o lea faamoemoe mo le manuia aua na amata i le 1910 Edinburgh/ Mission, 1925 Stockholm/ Life and Works, 1927 Lausanne/ Faith and Order, 1948 Amsterdam/ World Council of Churches.

Afai na faavae le FEL 1948 ae faatoa fa'atū le EU ile 1957, e manino le mata o le vai, o le agaga o le galulue faatasi na tupu a'e i Europa, na taulāmua ai lava le talalelei.

O le tulai ese la o Peretania mai le aiga potopoto o le EU, ua sosofa ai lava e Peretania le galuega tele sa faia i Europa mai aso ua mavae, ma le tau faamaopopo o le aiga potopoto. Ai lava o le mea lea e ta'u o le toe foi i le ola tutoatasi. A ua tatou manino lelei i

⁶ Ose alii Loia na faafalepuipui mo le 27tausaga i lona finauina o le aiatatau a ona tagata uli. Na tatala o ia e Pres. deKlerk i le 1990 ma la galulue ai loa e faamuta faiga faailoga lanu i Aferika i Saute. Sa avea o ia ma Peresetene o Aferika i Saute 1994-1999.

⁷ Ole Anglican bishop sa finauina aia tatau o tagata uli i le vaitau o le 1970 ma ona tua mai.

⁸ Pacific Council of Churches

⁹ Ao le 1982 tofia ai le Komiti fatu-maufauga e saili atili iai, Charles Forman, Russel Chandran, Sevati Tuwere & Faitala Talapusi.

aoaoga e tele a le Tusi Paia e uiga i le leaga o le ola tutoatasi aua e fanau mai ai le fia sili ma le lē-alofa.

(ii). Ua faaleaogaina le mafaufauga faaKerisiano “ole filemu” na faavae a’i le EU.

Ai ua galo ia Peretania Jean Monnet (d. 1979) ma Robert Schuman (d. 1963) o Faipule Farani na faavaeina le EU. O i laua ia na miti, ina ia taofia loa le toe fetuia’i o Europa aemaise lava i le va o Farani ma Siamani. Talu mai le 1870¹⁰ na faatolu lava ona vevesi leaga atunuu ia e lua, aemaise lava le taua i le 1939-45 na matua aafia ai foi le lalolagi tele i le a’eaē o le malosi o Hitila ma le Nazism a Siamani. Ina ua uma le taua na talia e Europa lea augani ma amata ai loa ona atia’e atunuu uma ile tamaoaiga e fefaasoa’i ai. Ia faasoa i tamaoaiga ae le o le pulufana. O le ala foi lea na mafua ai ona tasi le maketi (single market) i Europa ma galulue ai loa le EU seia oo mai i le asō, ina ua 28 ona sui, ae tasi pea lava la latou maketi o fefaatauaiga. O le toe fultua la o Peretania i le EU, o se fultua lava lea i le agaga lelei sa faavae a’i le mafutaga mai aso ua mavae, a o se mea lelei lava na tupu mai mafaufauga faaleagaga.

(iii) Pe le ua lilo i le vaai mea e manuia ai Peretania?

O le ulufafo o Peretania mai le EU, pe le o le lilo lava lea i le vaai a Peretania o mea e manuia ai? pe a fua i le saunoaga faanoanoa a lesu ina ua vaai ma na iloa atu Ierusalem, peitai ua ia silafia lelei ua le taliaina e le aai lana feau.

Luka 19:41-42 “ua latalata o ia, ua silafia e ia le aai, ona tagi ai lea o ia, ua faapea ane, “Ana e iloa, o oe lava i lenei lava aso, o mea e manuia ai! A o lenei ua lilo i lau vaai.”

O le fesili tele ua tula’i mai mo tagata Peretania, pe faapefea nei ona avea i latou ma tuaoi o le 27 atunuu ua latou tuuna. Pe faapefea nei ona ta’u uso leisi 27 atunuu ua latou tuuna?

FOLAMULI.

Ua fia o ese Peretania ona o mafuaaga ua taua i luga. 1.Tamaoaiga, 2.Tapunia faitotoa mo e sulufa’i ona ua ofi mai ai ma tagata faatupu faalavelave. O le mea moni, peiseai ua avea faiga faa-aiga potopoto EU ma ala ua migi ai lona tamaoaiga ma latou fia o ese ai loa e ola lava latou mo latou. Pe le o faapena tatou i Samoa nei? ile migi ole tamaoaiga o e malolosi i e vaivai, ma vave ai loa ona fia nofonofo toatasi le lima malosi i se mea na o ia lava ma lona toalua ma lana fanau? Afai o tupu, o le Brexit, poo le Samexit lava lea. (Samoa-Exit)

Peiseai o le fesili, afai tatou te faataua le faiga faa-aiga potopoto, e i ai se tuaoi e va a’i le space o le aiga potopoto ma le space o le tagata toatasi? Faapefea ona saga faataua aiga potopoto pe afai e oti ai? Pe le sa’o le faaiuga a Peretania e o ese mai le aiga potopoto ina ia ola e ala i le taofia o tagata fai mai i totonu aua ua lalafi mai ai ma tagata leaga?

O le solomuli mai le pelulale i le segila, o le finau foi lea a Donald Trump, “ia faafoi Amerika ia Amerika”, ma ua lagolagoina malosi e tagatanuu. Ua vavala mai ai lava ia Peretania ma Amerika suiga tetele ua agai mai. A o la ta aganuu ma faiga faaEkalesia i Samoa nei, o loo sosolo lava i luga o faiga faa pelulale, faiga faa-aiga potopoto. O faiga ua manatu Samoa e manuia ai. Ae faamata o tumau le manuia? Ae poo manuia uma, pe toaititi ē manuia ae faaletonu le toatele? I le ma lenei o Samoa i nei aso ua tele Saina, Initia ma faipisinisi eseese. O nei tagata e lē ma’ima’i. I latou ua matuā ‘puputa’ a latou pisinisi ina ua matua ‘pae’e’e’ ai lava a tatou atotupe. Pe le ua latalata mai i Samoa le lē fia i ai?

******Manuia le Mafutaga******

¹⁰ 1870 Franco–German war. Napoleone (Farani) vs. Prussia (Siamani)... O le va lava lea na i tua o le WWI (1914).... Ma le WWII 1939-45 Peretania & Farani vs. Siamani na amata ai.